

Aznar: «Ez dugu ezer ordaindu bakearen truke, eta ez dugu ezer ordaindu behar»

Espainiako presidentea Iruñean izan da, Caballeroren heriotzaren urteurrenean

Juan Kruz Lakasta / Iruñea

Bakegintzari dagokionez ETAre su-etena hasi zenetik izan duen jarrerari eutsiko diola iragarri zuen atzo Iruñean Espainiako presidentea Jose Maria Aznarrek. «Orain arte ez dugu deus ordaindu bakearen truke. Konstituzioaren eta estatutuen defentsa tinkoari eutsi diogu, eta horrela segitu behar dugu aurrerantz ere», azaldu zuen.

ETA-K Tomas Caballero UPNko zinegotzia hil zuen eko lehen urteurrena zela eta izan zen Jose Maria Aznar atzo Iruñean. Zendutako zinegotziaren izena daraman fundazio bat eratu dute Nafarroako hiriburuan, eta fundazio horrek *Humanismo y libertades* izeneko jardunaldiak antolatu ditu. Hitzaldia egin zuen atzo Aznarrek jardunaldi horien baitan, eta entzule izan ziren, besteak beste, zendutako zinegotziaren senideak, Miguel Sanz Nafarroako lehendakaria, Lola Eguren Foru Parlamentuko presidentea, UGTko idazkari nagusi Juan Antonio Cabre-ro, CCOOko idazkari nagusi Jesus Garatea eta UPNko hautetsi eta militante ezagun anitz.

Bakegintzaz mintzatu zela-rik, PPko agintariak bere lelo ezaguna erabili zuen: «Ongi doa». Azaldu zuen ETAre su-etena hasi zenetik egoera «hobea» dela, ez dagoelako ez hilketarik ez bahiketarik. Ildo beretik, adierazi zuen



Jose Maria Aznar, Tomas Caballeroren emazte Maria Pilar Martinez agurtzen atzo, Iruñean.

egoera horren truke ez dela ezer ordaindu, eta «Espainiako demokratek» jarrera horri eutsi behar diotela aurrerantz ere. «Eskua zabalik eduki behar dugu, baina eskuak irmoa behar du izan, erreferentzia nagusia hauxe baita: bakeak ez duela preziorik», adierazi zuen.

Esku zabal eta irmoaren erakusle aipatu zituen Espainiako Gobernuak «espetxe politikan egin dituen aldaketak, presoek hurbilketarekin zein karrikaratzearekin loturik eduki ditzaketen itxaropenei dago-kien», eta «hilketarik egin ez dutenak Espainiara itzultze-

rik eduki dezaten hartutako neurriak».

Konstituzioaren eta Estatutuaren defentsa

Espainiako presidentek, bakegintzaren inguruan hitz egiterakoan, nabarmendu zuen «Espainiako demokratek» jarreraren zutabe nagusia Konstituzioaren eta Estatutuen defentsa egitea izan behar duela, eta «nazionalistek» beren jarrera aldatu behar dutela. «Ezin duzu jarrera bera eduki ezer ez duzunean eta guztia lortzen duzunean, eta Espainia azken 20 urteotan herririk

zentralistena izatetik herririk dezentralizatuena izatera pasatu da. Nazionalistek aldarrikapen jarrerak baztertu eta elkarlanari ekin behar diote».

Ildo beretik, Aznarrek esan zuen «nazionalisten muturreko politika baztertzaileek» Kosovokoa bezalako egoerak eragiten dituztela, eta politika horiek hil zutela Tomas Caballero.

Bestalde, «Caballeroren ideiekin bat eginez», PPko buruak esan zuen berak ere «Espainiaren batasunarekin loturiko izaera bereziko Nafarroaren alde» egiten duela apustu.

erreakzioak

Miguel Sanz • Nafarroako presidentea

«Giza eskubideen aldeko borrokalaria izan zen»

«Tomas Caballero Justizia sozialaren eta giza eskubideen aldeko borroka- ren ikurra izan zen. UPNko zinegotzia baino askoz gehiago zen. Haren ibilbide demokratikoan orbanik txikena ere ez zegoen. Urteurrenean, gainera, bestelako aburuak daukat; izan ere, orain ETak erailketak egiteari uzteko prozesuari ekin dio. Su-etena lehenago hasi balitz gauzak ez ziren orain diren modukoak izanen. Orain Caballeroren eredu besterik ez zaigu geratzen».

Pernando Barrena • EHko zerrendaburua

«Gure apustua horrelakorik ez errepikatzea da»

«Ezker abertzalea apustu indartsua egiten ari da Tomas Caballeroren heriotza bezalako gertakari latz eta samingarririk ez daitezkeen. Espainiako Gobernu eta UPN inmovilismoari eusten ari dira, eta gatazkaren irtenbide demokratikoa oztopatzeko jarrera dute. Bestalde, Borbondarren bisitaldien eta Aznarrek gaur egin duenaren helburu bakarra Foru Hobe-kuntza, Nafarroari inposatu zaion eredu zaharkitua indartzea da».

Felix Taberna • IUko koordinatzaile nagusia

«Gauza asko aldatu dira»

«ETA desager dadin, guztiok tolerantzia oinarrituriko bizikidetza demokratikoaren alde egin behar dugu apustu. Inolako zalantzarik gabe, alderdi politikoak erronkari aurre egiteko gai izanen dira, eta Tomas Caballero bizitakoa baino hobea den eguno egoera sozial eta politikoa sendotzeko beharrezkoak diren urratsak eginen dituzte. Azken urtebetean gauza asko aldatu dira, eta Tomas Caballerorena Nafarroan zio politikoko azken hilketa izatea espero dugu».

Javier Caballero: «Ez zuen zentzurik»

ETA-K 1998ko maiatzaren 6an erail zuen Tomas Caballero UPNko zinegotziaren ome-nezko meza egin zuten atzo Iruñeko hilerrian. Iruñeko Udalak antolatutako ekitaldian parte hartu zuten udal alderdi guztietako ordezkariak, Herri Batasunakoek izan

ezik. Udaleko taldeez gain, Nafarroako presidentea Miguel Sanzek eta zendutako hautesi erreionalistaren hainbat senidek eta lagunek hartu zuten parte. Ekitaldiaren ondotik, omenduaren seme nagusi Javier Caballerok duela urtebeteko erailketaren

gainean jardun zuen, eta esan inolako zentzurik ez zuela izan. «Denborak aurrera egiten duen ahala, gero eta argiago ikusten dut hura sekulako zentzugabekeria izan zela».

Senideentzat atzokoa egun «gogorra» izan zela azaldu zuen

Javier Caballerok, «barruan guztia mugitzen» delako, baina halaber kontent zirela «ekitaldiak argi uzten duelako herritarrek zenbateraino maite zuten, eta herritarrek zer-nolako balorazioa egiten duten besteen onerako lan egiteagatik bizia eman dute-

nez». Iruñeko CDNko alkate Javier Chourrautek nabarmendu zuen hilketa hark zinegotzi guztiak samindu zituela, eta horrek balio izan ziela «askatasuna eta demokrazia bezalako balioei tinkoago eusteko» eta horren alde egiteko.